

Presentade la edizion 2014 de rassegne culturâl de Associazion Colonos, che a tacarà ai 30 di Lui proponint musiche, poesie e riflessions su ce che al sucêt in Friul. » DI **CHRISTIAN ROMANINI**

Victor Hugo al diseve "Intun cîl di gnot, cualchidun al viôt dome il scûr, jo o preferis contemplâ lis stelis".

Cu la profunditât di chestis pe-raulis che a pandin otimisim ancje dentri de dificolte, si presente la edizion 2014 di Avostanis, la rassegne culturâl de Associazion Colonos che si davuelc te cort dal omonim agriturisim di Vilecjace di Listize sot de direzion di **Federico Rossi** e cu la consulente di **Angelo Floramo**.

Tra i events di segnalâ (il calendari dai apontaments si vierç Sabide ai 30 di Lui e si siere Martars ai 2 di Setembar) nol mançarà nancje cheste volte **Philippe Daverio** cu la conference intitulade 'La creativitat nus salvarà' e che za te presentazion e propon in maniere clare une strade par saltâ fûr de dificolte che aromai di masse timp e somee scjafaiânus.

NOTIS PROTAGONISTIS

Come ogni edizion, te cort dai Colonos si sinterà ancje tante musiche: par esempi, Musica in Villa, il circuit di concerti organizât in colaborazion cul Proget Integrât Culture dal Friul di Mieç, al puarte chest an 'Re Noir', l'omâç musicâl dai Mitili FLK a **Federico Tavan**, mancjât ai 7 di Novembar dal 2013. Su scrits e poesiis dal poete di Andreis a saran sul palc cun musicchis originâls **Cristina Mauro**, **Loris Luise**, **Alessandro**



Il concert di Paolo Tofani ai Colonos

Gnots speciâls par Avostanis

Montello, Stefano Montello e Flavio Zanier, compagnâts dal Quartetto Pezzè componût di **Nicola Mansutti**, **Lucia Clonfero**, **Elena Allegretto** e **Mara Grion**.

LETATURE MINIME

Lunis ai 11 di Avost al sarà invezit il moment de leterature 'minime' cu la serade di premiazion dal concurs 'In trê riis'. Protagoniscj oltri che president de jurie **Carlo Tolazzi** e i autôrs finaliscj, o varin sul palc ancje **Alessandro Di Pauli** e **Tommaso Pecile**, ven a stâi i 'Felici, ma furlans', e il rapper Dj Tubet (**Mauro Tubetti**).

Al sarà spazi ancje pal cine e par une mobilitazion ative: Sabide ai 9 di Avost cu la serade 'Nedisia'

si inviarà la campagne di finanziament populâr (crowdfunding) pal gnûf film di **Paolo Comuzzi** e **Andrea Trangoni**. Cui autôrs a intervignaran **Gabriella Totolo** e **Aldo Colonnello**.

E par restâ in teme di cine i Colonos in colaborazion cul Centri Espressions Cinematografichis di Udin a fasaran omâç al poete **Pierluigi Cappello** cu la proiezion di 'Parole Povere', il film a lui dedicât e realizât de regjiste **Francesca Archibugi** che e sarà presinte cul musicist **Battista Lena** miercus ai 27 di Avost.

Il program intîr si cjate su Internet tal sît www.colonos.it serade par serade.



ilfriuli@ilfriuli.it

CONCORS LETTERARI

Il Premi San Simon al alce il cjâf

Lunis ai 30 di Jugn si è Lsierade la pussibilitât di partecipâ ae edizion numar 35 dal premi leterari San Simon di Codroip.

Dopo de scjarse partecipazion dal an passât (dome 4 oparis, ma tantis polemichis) chest invezit i organizadôrs no platin la sodisfazion pes 16 oparis presentadis.

Si trate di romançs e racueltis di contis, che a rapresentin la novitât dal bant di chest an. Se si conte che il concurs al jere stât presentât dome a Zenâr, si capis che za cussî chescj numars a rapresentin un sucès che al va in part a distudâ lis criticchis che a acusavin la leterature furlane di jessi une pardabon in crisi.

Par cognossi il vincidôr, se al sarà (tal 2013 il premi nol è stât assegnât), si varà di spietâ ai 28 di Otubar, ma intant la jurie, formade di **Pierino Donada**, **Carlo Tolazzi**, **Walter Tomada**, **Lorenzo Zanon** e **Rosalba Della Pietra**, e je za in vore par decidi cui che si puartarà a cjase i 1.500 euros e la relative targhe premi.

SCOLTADIS DI DRIUS

Plui vecjo

Mi displasarès murî adore. O varès ancjmò une robe che mi larès al cûr di fâ: diventâ plui vecjo.



Euronews informa

Controi sui camions par combati la concorinche sleâl dai forescj



Controi ai autotraspuartadôrs forescj. La Provincie di Udin e continue a fâ la sô part cun verificchis ai veicui che a passin su lis stradis di competence, midiant di scuadrîs formadis di tecnicis de Motorizazion Civil e agjents de Polizie Provinciâl. Ae ativitât ordenarie in cors, intai dis passâts, si son zontadis verificchis cul jutori dal "Centro Mobile revisione mezzi pesanti". I imprescj naulizâts de Provincie a fasin verificchis sedi documentâls dal mieç sedi tecnicis e mecanichis e a valutin ancje lis eventuâls cjamis fûr di leç.

A son stâts controlâts in total 129 mieçs, di chescj 74 nazionâi e 55 forescj. Lis multes rilevadis a son stadis 42 par complessifs 3.980,50 euros di sanzions.

«Si trate - al spieghie l'assessôr ae Motori-

zazion civil Marco Quai - di verificchis voludis fuartementri des associazions di categorie che e domandin plui controî ai camions che a corin su lis nestrîs stradis, in particolar a chei forescj che a vegnin dal Europe dal Est, che di chescj a denunciin la concorinche sleâl pal ûs di camions vecjos e che a incuinin, cence revisions e colaut, cun documentazion di traspuart scjarse e no adeguate».

Il monitorament che al è stât realizât al consist intune complete revision par verificâ il rispîet dai nivei di sigurece previodûts de normative. Al control tecnic al è stât metût dongje ancje chel amministratîf e documentâl, par esempi, su la regolaritât dai documents di traspuart ancje su la fonde des normis sul traspuart internazionâl e sul efetif funziona-

Quai, «Lis verificchis a rispûindin a une esigence des associazions di categorie dal teritori»

ment dal cronotachigraf. Lis sanzions elevadis a podaran jessi paiadis sedi in contans sedi midiant Pos e a podaran zovâsi di une riduzione dal 30% tal câs di paiaments imediâts (obligatoris pai forescj) cemût che e previot la normative inzornade di resint. Par ce che al rivuarde la ativitât di control fate tal 2013, i accertaments esegûts dal principi dal an a àn rivuardât 126 mieçs, 68 di chescj a jerin forescj; tal 2012 invezit, a son stâts controlâts in dut 154 veicui, 45 di chescj nazionâi e 109 forescj. A son stâts notificâts 51 verbâi di illecits amministratîfs previodûts dal Codîç de Strade par un total di 3.810 euros di sanzions, 27 di chescis a camions forescj. Par 2 veicui nazionâi, e je stade disponude la revision straordenarie.